

QUÆSTIO MEDICA,

Quodlibetariis disputationibus manè discutienda in Scholis Medicorum, die Jovis decima-quinta Novembris 1714.

M. PETRO-ANTONIO LEPY, Doctore Medico,
Præside.

An pulmo præcipuus sanguinis opifex?

I.

VITÆ fomes & instrumentum sanguis. Fecundæ instar scaturiginis microcosmum irrorat, fovet, nutrit. Succus dulcis, mollis, ferè in infinitum scitilis. Duas in illo partes reperire est conspicuas, obviasque sensibus, serum & crassamentum. Prius cum aquosam complectitur sanguinis portionem, cum lymphaticam, ex quâ proximè nutritio; ubi leni calore turgescit, agitur in bullas, abique sensim in vaporem, mox in *gelatinosam* densatur substantiam, tandemque in osseas veluti, pelliculas, & cornu similes lamellas concrevit. Posterius duplici constat substantiâ, purpureâ nimirum & fibrosâ. Purpurea congeries est globulorum rubentium ex aliis tenuioribus conflatorum, abeuntibus in pellucida quædam & plano-ovalia segmenta. A coacervatis ejusmodi globulis, rubicundus sanguinis color; horum vix ullusprehenditur ad humanæ machinæ functiones usus: quot enim animalia purpureo sanguinis colore destituta? Pars altera crassamenti fibris distincta est retis in modum implicitis: in ejus loculis serum & globuli rubri delitescent. Crassioribus constat ponderosioribusque moleculis, quibus præceps volatiliū imperius cohibetur, adeoque citatior eorum effluxus miris modis reprimatur. Hæc dum perpetuo circuituionis motu attenuatur atque migrat in serum, recentis appulsu chyli usque restituitur. Quisquis locum noverit in

quo purpureus hic latex maximè conteritur, certè germanam re-
texerit sanguinis officinam, & in divini liquoris quasi sacrarium pe-
netrarit?

II.

NIHIL felicior recentiorum industria quàm veterum, in ex-
cogitandâ hæmatoseos causâ. Nodum illi per fermentum, hi
per jecur, refecant: neutri solvunt. Imò verò ut circuitus illius miri-
fici inscitia hos à culpâ quodammodo vindicat, sic illos invicta har-
væi experimenta turpi errore premunt. Ecquid enim adversetur ma-
gis circuitui quàm fermentatio, motui totius quàm principiorum, pro-
gressivo quàm expansivo. Qualia chyli, talia videas & sanguinis in-
strumenta. Molaribus primùm dentibus, dein musculosis stomachi fi-
bris tunduntur alimenta in chylum; simili prorsus ratione partium
solidarum *oscillationes* repetitæ, variique anfractus quos subire cogi-
tur sanguis, debitam ipsi impertiunt naturam. Dubitas? Nonne quò
tenuior sanguinis substantia, eò ad obeunda munia corporis accom-
modatior? Fibra sanguinea rite contrita capillares meatus pervadit;
succus nutritius sèro dilutus, omni ex parte comminutus & ad vaso-
rum usque oscula delatus, erumpentium furtim particularum jactu-
ram refarcit. Quanquam autem cor & arteriæ in sanguinis opificio
partes suas agant, vasa tamen pulmonaria ab aëre compressa præci-
puum hæmatoseos opus sibi vindicant, tanquam primaria hujus in-
strumenta.

III.

RESPIRATIONIS materies aer, organum pulmo; cujus mo-
les; figura, numerus diversis in animantibus diverso se habent
& mirabili modo. Hic verè ludens natura luxuriat. Testudinis pul-
mo ad infimam usque ventris inferioris partem pertingit; in inse-
ctis omnibus multiplices tracheas arterias per totum corpus dispersas,
arteriarumque more divisas observes. Octodecim pulmones in papi-
lionibus animadvertuntur; & quidem inclytam illam corporis orga-
nici partem natura solers præparandis succis ita necessariam duxit, eâ
ut plantas carere non passa sit. Enimverò plantæ per vascula patula,
flexilia, atque ex lamellis vel squammatis dispositis, vel in spiræ mo-
dum contortis conflata sic vigent, ut ejusmodi vasculis, pulmonum
ritu, aerem ex terrâ suscipiant, quo deinde succi nutritii solutio per-
ficiatur. Mira in homine pulmonum compages, visu non præclara mi-
nus quàm usu. Coalescit nimirum ex levissimis tenuissimisque mem-
branis, quæ extensæ sinuantur in infinitas penè vesiculas; istæ autem
sic inter se disponuntur, ut ex tracheâ in vesiculas, ex alterâ vesiculâ

in alteram aditus pateat liber, omnesque tandem in membranam continentem desinere videantur. Hæ porro capsulæ quamplurimis ductibus sanguineis interiùs scarent, exterius verò vasis constant in reticuli modum contextis, & ita gracilibus ut pro staminibus nervosis habitæ fuerint. Quantulæ sint sanguinis moleculæ, quæ tam arctos, sinuosos, (quales nullibi reperire sit) meatus transcurrunt, quantaque sit vis aeris in sanguinem irruentis per tot derivatum canaliculorum mæandros, cui non exploratum?

I V.

CAVENDUM imprimis ne fucum incautis faciat vis elastica cordis à neotericis meritò decantata. Cor cerè musculus est virtutis non spernendæ; ipsius quoque aortæ suis instructæ carnosæ fibræ vegetus admodum motus. Neque tamen est quod cum pulmone de palmâ contendat. Huic datum est præcipuum quoddam regni corporei munus exercere, fontemque vitæ sanguinem conterendo perficere. In corde unius momenti pressio, & in singulas sanguinis partes unica. Neque verò dixeris in capillaribus aortæ ramulis æquè ac in pulmonaribus incidi sanguinis particulas: illic enim systoles diastolesque motus admodum videtur remissus, nulla est irruentis aeris actio, nulla pressio. Nec mirum: ibi enim homogeneæ particulæ sibi invicem adhærent, reliquasque tantum elabi sinunt: extrema verò vasorum pulmonarium non ad sæcernendas, sed ad conterendas, comminuendas, miscendasque moleculas natura comparavit. Atque hinc est quòd fuerint eo contextûs artificio elaborata, ut ad industriæ specimen non minus quàm ad corporis organici principem usum effecta dicas. Aer in pulmones delatus solâ vi percussione vesiculas aeri non pervias expandit; hæ naturali elatere extensioni obsistunt: quantus igitur inde sanguinis attritus duabus subjecti hinc & inde viribus, ductusque angustissimos, longissimos, maximeque tortuosos permeantis?

V.

INTIMAM sanguinis fabricam quisquis propius rimari voluerit, æmulam naturæ artem miretur in opificibus. Illi ut corpora quædam tenuissimum in pulverem comminuant exigua materię comminuatæ partem lapidi (quem porphyritem vocant) impositam alterius saxi collisu conterunt. Pari ratione sanguis alveos arctissimos pulmonumque vesiculis coextensos permeans magis ab aere comprimitur attenuaturque quàm si patentioribus vasis spatiosè containeretur; enimvero liquidum est corpus solidorum pressioni obnoxium, quæ quidem si languesceret & remitteretur, illud motum & *fluiditatem*, id est naturam præstantiamque amitteret. Cùm igitur per fermentationem nati-

va sanguinis pervertatur crasis, nec salia fermentescere apta in eo reperire sit, nodum in scirpo quærit, qui ab aliâ causâ quàm à solidorum tritu reperit sanguinis perfectionem. Ubinam accuratiùs quàm in pulmone absolvitur? Quo vigente viget, labefactato corrui innumeras ægritudines paritura sanguinis compages. Aliam assigna partem corporis aptiorem, ô perspicax naturæ indagator, qui repugnans. In pulmone à naturâ comparata est idonea organorum terentium supellex, ibi arteriarum motus, ibi aeris compressio, ibi vesicularum vivax mirabilisque agitatio. Erumpens inde sanguis spumofus, coccineus, & tenuissimus.

Ergo pulmo præcipuus sanguinis opifex.

Domini Doctores disputaturi.

M. Antonius Geoffroy, Rei
Herbaria Professor.

M. Joannes Franciscus Con-
thier.

M. Joannes-Baptista Mongin,
Medicus Regis ordinarius.

M. Alexander le François.

M. Michael Prosope-
teaux.

M. Joannes Claudius Advia-
nus Helvetius, Medicus Re-
gis ordinarius.

M. Petrus Navais.

M. Franciscus Vernage.

M. Joannes-Baptista Dodart
Serenissima Principissa Do-
taria de Conty Medicus
ordinarius, & Serenissimi
Delphini dum viveret Pri-
marius.

Proponebat Parisiis JOANNES-MATTHÆUS LE BERT
Parisiinus, Baccal. Medicus, A. R. S. H. 1714.

Typis JACOBI QUILLAU, Universitatis, & Facultatis Medicinæ
Typographi.